

urget et magis determinat. « Archipresbyteri, plebani et quicumque parochiales vel alias curam animarum habentes ecclesias quocumque modo obtinent, per se, vel alios idoneos, si legitime impediti fuerint, diebus saltem dominicis et festis solemnibus plebes sibi commissas pro sua et earum capacitatem, pascant salutaribus verbis, docendo quæ scire omnibus necessarium est ad salutem, annuntiandoque eis cum brevitate et facilitate sermonis vitia quæ eos declinare et virtutes quas sectari oportet, ut peñam æternam evadere, et cœlestem gloriam consequi valeant. » Concil. Trid.. sess. 5, cap. 2 de Reform. Eadem obligatio exprimitur in sess. 24, cap. 4 de Reform. in quo, præter dies dominicas et festa, additur quod tempore Quadragesimæ et Adventus quotidie aut saltem tribus in hebdomada diebus prædicandum sit, si ita oportere duxerint episcopi. Ergo negari non potest cunctos pastores strictam habere obligationem juris ecclesiastici populos sibi commissos sana doctrina frequenter pascendi.

3º Graviter peccant parochi qui tribus mensibus anni, etiam discontinuis, per se vel per alios non concionantur : nam Concil. Trid., sess. 5, capite citato, ait : « Itaque ubi ab episcopo moniti trium mensium spatio muneri suo defuerint, per censuras ecclesiasticas, seu alias, ad ipsius episcopi arbitrium, cogantur. » Tantæ peñæ non decernuntur nisi pro culpa gravi. Ergo. *Ita omnes theologi, etiam moliores.*

4º Sæpe longe minus spatium temporis sufficit ad constituendum peccatum mortale. *S. Ligoriu*s, l. 3, n. 269, dicit non improbabiliter a pluribus doceri graviter peccare illum qui per mensem continuum prædicationem omittit. Alii tamen paulo minus urgent. Habenda est ratio statutorum diœcesis, et circumstantiarum quorumdam anni temporum, ubi vel pastor prædicare vel fideles audire difficilius possunt. Si parochus transitorie infirmatur, excusari potest : si vero infirmitas videatur perpetua, officio cedere vel coadjutorem ab episcopo petere debet. Habenda est etiam ratio majoris vel minoris necessitatis juxta om-

nium vel quorumdam ignorantiam aut vitia. Ubi autem non reperiuntur qui in tali sint spirituali indigentia ? Licet autem parochus huic muneri satisfacere possit per alios prædicatores, sive ordinarios, sive extraordinarios, non se tamen putet liberum, si saltem quandoque ipse non prædicet ; nec etiam judicet se excusari quavis consuetudine, vel parvo fidelium numero, vel frequentia aliarum ecclesiarum.

*Notandum* insuper, prædicationem indigentia et capacitatibz audientium non proportionatam prorsus insufficientem esse, pt parochus muneri prædicationis satisfaciat. Quot ergo parochi judicio Dei damnabuntur ob solam gravissimæ hujus obligationis omissionem !

5º Nomine prædicationis non intelliguntur sermones juxta eloquentiæ regulas compositi, ornati, memoriae commendati et prouantiati : quandoque sunt utiles vel necessarii, v. g., in solemni festo, in extraordinario concurso ; sed communiter parochus, tales habendo conciones, muneri suo minime satisfaceret. Studeat pro viribus suis facere quod præscribit Concil. Trid. in textu superiori citato, et quod ipse ovibus suis magis expedire judicabit : non tantum intra missarum aliorumve officiorum solemnia populum coadunatum sana doctrina sic imbuere satagat, sed in catechismis, in scholis, in dominibus privatis, denique omnibus viis quæ sibi efficaciores videbuntur, ut dicere possit cum Apostolo, Act. xx, 26 : *Contester vos hodierna die, quia mundus sum a sanguine omnium, sciens quod si vel una anima culpa ejus pereat, Deus illam de manu ejus requisitus sit.*

6º A peccato igitur mortali excusari non possunt parochi 1º qui raro prædicant, nisi legitime impediantur, quo in easu curare debent ut alii pro ipsis hoc munere convenienter fungantur ; 2º qui nullam aut fere nullam adhibentes præparationem, loquuntur sine ordine, claritate, pietate et zelo, verbum Dei indigne tractant, et fastidium in audientibus excitant ; 3º qui conciones minime congruentes pronuntiant ; 4º qui in prima Missa, cui fideles magis ignari assistere solent, concionari no-

lunt, et a *fortiori*, qui vicarium a brevi et facili concione, hujusmodi fidelibus proportionata, prohibent; 5º qui sua negligentia in pueris catechizandis, in scholis visitandis, in rudibus requirendis et instruendis, causa sunt cur animæ sibi concreditæ pereant. Unde qui munus catechizandi et concionandi, v. g., in prima Missa dierum dominicarum et festivorum, vicariis aliisve committunt, prudenti sollicitudine invigilare debent ut omnia convenienti modo fiant, alioquin rationem ipsi supremo Pastorì reddere tenebuntur de animabus sic periturus.

7º Vicarii ab episcopo in adjutorium parochorum missi, vices eorum gerere pro posse suo tenentur: graviter igitur peccant si notabiliter sint negligentes in concionando convenienti modo, in catechizando et in alia munia sibi commissa exercendo.

8º Pluries a nobis quasitum est utrum parochus qui, allegans se conciones scribere, memoria retinere et pronuntiare non posse, piis facit lectiones, loco sermonis ad populum, muneri suo satisfaciat. Certum est melius esse tales facere lectiones quam omnino tacere, ac consequenter qui memoria coneionari non potest, eas omittere non debet. Attamen evidens est Concil. Trid. conciones viva voce datas requirere, et experientia constat eas multo efficaciores esse. Si magistri in scholis non nisi legendo artes et scientias docere vellent, numquid muneri suo satisfacerent? Certe difficilis est fideles omnis ætatis et conditionis vera religionis doctrina imbuere: caveant ergo parochi et quicumque saluti animarum præponuntur, ne in re tantæ gravitatis sibi illudant. *Collet, Devoirs des curés*, c. 7, § 1, permittit ut parochus qui multis annis feliciter laboravit, et propter senectutis infirmitates aliasve causas accidentales factus est impotens viva voce concionari, proprios sermones vel aliorum homilias prudenter selectas populo legat; verum docet eum qui concionari non valet, curam animarum suscipere non posse, nisi impossibilitatem qua detinetur aperiat episcopo, et episcopum debere, ob hanc causam, eum communiter repellere. Excipendum tamen est si

alium non habeat sacerdotem huic ecclesiæ præficiendum.

9º Quamvis Urbanus VIII approbaverit decretum S. Cong. Conc. diei 2 maii 1629, in quo statuitur ut, prædicante episcopo, omnes alii concionatores sileant, eadem S. Congregatio respondit, die 11 januarii 1631, id non intelligi respectu parochorum qui eadem die in ecclesia parochiali concionari possunt.

10º Si parochi per se munus prædicationis obire velint, impediri non debent, et tempore Quadragesimæ etiam mane in suis ecclesiis prædicare possunt, non obstante consuetudine quod in sola ecclesia matrice vel in alia concionetur, ut S. Cong. Conc. definiit die 26 jan. 1697.

11º Parochi nullum sacerdotem sibi ignotum ad concionandum in suis ecclesiis admittere possunt, nisi ab Ordinario loci fuerit approbatus; nec etiam notum, ad stationem aut missionem faciendam, sine ejusdem Ordinarii consensu; nec diaconum aut alium inferiorem clericum: sed dare possunt licentiam alicui viro docto et noto, etiam regulari, ut bis vel ter concionetur in suis ecclesiis, sine approbatione episcopi. A *fortiori* hanc licentiam dare possunt et debent eis qui ab episcopo sunt approbati. Ita communiter theologi apud *Ferraris*, vº *Parochus*, art. 2, n. 79.

12º Qui coram episcopo verbum Dei annuntiatur est intra Missam, finito Evangelio, ante *Credo*, benedictionem ab eo genuflectens, vel, si canonicus sit, profunde inclinatus, petere debet: ubi vero habendus est sermo extraordinarius, v. g., ad publicandum Jubilæum, ad gratias Deo agendas pro aliquo felici nuntio vel publicatione foederis, vel adventu magni principis, aut simili occasione, fieri non debet intra Missam, sed ea finita, et tunc non petitur benedictio. Idem observandum si sermo habendus sit in Missa defunctorum vel in laudem aliquius magni viri defuncti: fit inter Missam et absolutiōnem; *Cærimonial Episcop.*, l. 1, cap. 22. Mos apud nos invaluit ut verbum Dei annuntiatur, sive intra, sive extra Missam, excepta Missa defunctorum, genuflectens benedictionem petat, dicens: *Jube*, etc.

13º Notat Cæmerional. Episc., l. 1, cap. 22, n. 3, prædicatorem semper dicere Salutationem Angelicam, non vero *Regina cœli*, etiam tempore Paschali, quod apud nos non servatur. S. Congreg. Rit. respondit, die 23 januarii 1700, in confirmationem aliarum decisionum jam emissarum, prædicatores salutare teneri capitulum seu canonicos in apparatu chorali assistentes, prius quam civitatis gubernatorem.

*Nota.* Quædam sunt publicationes a parocho, per se vel per alium, necessario et sub gravi facienda, ut festa et jejunia observanda, quæ fideles cognoscere tenentur, matrimonia celebranda, vi legis ecclesiastice. Aliæ vero stricte prohibentur: sic prohibetur ne nova miracula, novæ revelationes, etc., annuntientur, aut festivitates vel processiones extraordinariæ indicentur, vel res omnino sacerdotes commendentur, petantur, etc., absque episcopi auctoritate vel licentia.

Lex 18 germ. an x, art. 53, ait: *Ils ne feront au prône aucune publication étrangère à l'exercice du culte, à moins qu'ils n'y soient autorisés par le Gouvernement.*

Prædicatores aliquem expresso nomine redarguere non possunt in actu prædicandi, sub pena excommunicationis Papæ reservatae, ex concil. Lateranensi V; *Ferraris*, v° *Prædic.*, n. 101. Strictissime caveant quilibet sacerdotes ne verbis incautis fideles offendant.

*De obligatione oves cognoscendi et corrígendi.*

1º Bonus pastor proprias oves vocat nominatum et educit eas, Joan. x, 3: ergo tenetur eas, quantum potest, cognoscere et quidem ex præcepto, ut præcisis verbis dicit Concil. Trid., sess. 23, cap. 1 de Reform., « cum præcepto divino mandatum sit omnibus quibus animarum cura commissa est, oves suas agnoscere. » Visitare ergo debet parochus suos parochianos, cum illis affectu paterno colloqui, patres et matres familias prudenter interrogare circa liberos, servos, ancillas, operarios, non vero dictoria ancillæ aliarumve feminarum loquacium

audire, et ita se gerere ut omnes perfecte noscat et nota curiositatis non incurrat.

2º Tenetur sub gravi oves in peccato mortali vel in proximo ejus periculo versantes corriger, etiam cum periculo vita, si possit, id est, si spes emendationis affulgeat: debet insuper, secundum suam prudentiam et potestatem, scandala auferre aut præcavere, per se vel per alios, mandato, consilio, exhortatione, precibus, etc. *Ita communiter theologi*, qui ut probabilius docent hanc obligationem esse ex justitia. Unde sequitur quoscumque pastores prudenti sollicitudine semper invigilare teneri in subditos, mores eorum require, eos delinquentes corriger, vacillantes sustinere, et prospicere ut omnes obligationibus suis satisfaciant, semper in mente habentes se strictam de illorum salute reddituros esse rationem.

P. III. — *De parochorum vicariis.*

Vicarii generatim ii sunt qui constituuntur ut aliorum vices gerant. Parochorum vicarii duplices sunt generis, perpetui scilicet et temporanei.

Vicarius perpetuus ille est qui canonice instituitur ad quamdam regendam ecclesiam loco principalis rectoris absens. Sciendum est olim multas ecclesias parochiales unitas fuisse monasteriis, capitulis, collegiis, etc. Ab hujusmodi piis cœtibus constituti solebant vicarii temporarii ad nutum amovibiles, qui curam animarum in parochiis sic unitis exercerent, ut notat *Bened. XIV*, de Synodo diœces., l. 12, cap. 1, n. 2. Cum hujusmodi vicarii frequenter et quandoque sine causa, cum animarum detimento, amoverentur, statutum est ut semel canonice instituti, vere essent beneficiati et perpetui, atque soli actualem curam animarum in parochia haberent, ita ut rector principalis vel prælatus sacramenta ibi, invito vicario, administrare non potuisset; *Ferraris*, v° *Vic. paroch.*, n. 30. Congrua redditum portio eis ab episcopo assignabatur; ideo dicti sunt parochi *ad congruum portionem*.

Hujus generis vicarii apud nos non amplius existunt, sed tantum vicarii temporales a solo episcopo constituenti et ad nutum ejus revocandi. Alii deserviunt ecclesiis vulgo dictis *annexes*, et alii multo plures apud ipsos collocantur parochos, ad eos adjuvandos aut supplendos generatim in omnibus pastoralis munera officiis.

Ex iis quæ de parochis diximus pleræque vicariorum obligationes facile intelligi possunt: in multis enim eadem cum quadam proportione incumbunt obligationes et parochis et eorum vices gerentibus. Quod jura vero in paucioribus cum parochis participant.

Delegatam tantum, juxta omnes, habent jurisdictionem, quia non exercent officium cui, ex jure, annexa sit potestas subditos regendi. Unde seclusa speciali concessione, nullum hujus jurisdictionis actum exercere possunt extra territorium sibi assignatum, etiam quoad ordinarios suos penitentes. Nec pariter valide, renitente parocho, assistere possent matrimonio, nisi aliter ab episcopo statutum fuisset.

Cum autem delegati sint ad universalitatem causarum, ad particularia, inter limites parochiæ exercenda, subdelegare possunt.

Presbyteri habituati non sunt deputati, sicut vicarii, ad representandum aut supplendum parochum. Caveant igitur ne alia sibi attribuant munera, præter ea quæ illis ab episcopo vel a parocho specialiter committuntur.

SECTIO QUARTA. — De aliis ad hierarchiam jurisdictionis pertinentibus.

De summo Pontifice in præsenti capite tacemus, quia de eo, ejusque prærogativis ac juribus in Tractatu *de Ecclesia* et alibi passim multa diximus.

#### P. I. — Cardinales.

In antiquissimis Ecclesiæ sæculis, non solus Romanus pontifex, sed et alii episcopi presbyterorum et diaconorum habebant senatum, quo in regenda sua ecclesia utebantur: hic senatus vocabatur etiam presbyterium.

Qui uni ecclesiæ modo permanenti erant addicti, sive *incardinati*, dicebantur cardinales, per oppositionem ad alios qui fixum titulum non habebant. Cum Ecclesia Romana sit caput omnium aliarum ecclesiarum, ipsius presbyterium eminentissimum semper tenuit locum, ipsias membra diversos possidebant titulos a S. Evaristo in variis Urbis regionibus distributos, et ideo vocabantur cardinales: quod nomen ab aliis ecclesiis sensim derelictum, soli Romanæ Ecclesiæ senatu seu presbyterio fuit proprium. *Ferraris*, v<sup>a</sup> *Card.*, art. 1, n. 1-8.; *Devoti*, tit. 4, 188 et seq.

Diaconis et presbyteris viciniores adjuncti sunt episcopi, scilicet Ostiensis, Portuensis, Albanus, Sabinus, Tuscanus et Prænestinus, qui munus episcopale retinentes, Romano pontifici opem ferebant in regimine Ecclesiæ. Triplicis igitur ordinis sunt cardinales, videlicet episcopi, presbyteri et diaconi.

Numerus eorum varius fuit, pro diversitate temporum et voluntate Pontificum. Verum Sixtus V, anno 1587, septuaginta titulos cardinalitios determinavit, sex episcoporum, quinquaginta presbyterorum et quatuordecim diaconorum, et prohibuit ne in posterum alii crearentur tituli, aut numerus cardinalium quovis prætextu augeretur. Huic dispositioni non fuit derogatum, sed titulus presbyteralis vel diaconalis sepe datur episcopo.

Cardinales, etiam non episcopi, episcopalem habent jurisdictionem in ecclesiis sibi subjectis.

In varias distribuuntur congregations pro negotiis Ecclesiæ tractandis, gerendis, vel definiendis: si omnes sub præsidentia summi Pontificis coadunentur, hic cœtus dicitur consistorium. Speciales congregations sunt *S. Officii* et *Inquisitionis*, pro sana Ecclesiæ doctrina conservanda; *Indicis*, quæ est quasi vicaria præcedentis, et ad examinandos atque judicandos libros constituta; *Councilii Tridentini interpretum*, pro dicti concilii intelligentia et executione; *de Propaganda fide* pro infidelium, hæreticorum et schismaticorum conversione; *Correctionis librorum Orientalium*; *Sacrorum Rituum*; *Indulgentialia*.

*rum et sacrarum Reliquiarum; Episcoporum et Regularium, etc.* Vide *Fagnan, Van-Espen, de Héricourt, etc.*

In Constit. Sixti V, diei 26 januarii 1587, quindecim instituuntur cardinalium congregations, quibus variæ conceduntur facultates et jurisdictiones, juxta naturam causarum et negotiorum ipsis commissorum. Aliquando simplices emittunt responsiones; quandoque condunt decreta quae majoris sunt ponderis; si ex consensu summi Pontificis edantur, vel approbatione ejus postea muniantur, adhuc majorem vim habent. Cum littera Apostolica quibus harum congregationum jurisdictione instituta vel aucta est apud nos publicatae vel usu receptae non fuerint, auctoritas earum non agnoscitur, nisi in quantum illarum decreta summi Pontificis approbatione muniuntur et in forma consueta promulgantur. Multi tamen aestimantur ponderis in elucidandis dubiis, in interpretandis legibus et in vero traditionum sensu assignando. Videantur ea quæ infra dicturi sumus Tractatu de Legibus, part. 2, cap. 2, art. 5, ubi de promulgatione legum ecclesiasticarum.

Principalis cardinalium functio est Romanum pontificem eligere: ex concilio Lugdunensi II, cardinales in civitate ubi Pontifex moritur presentes, decem diebus absentes exspectare tenentur; quibus elapsis, sive absentes venerint, sive non, omnes in eadem aëde convenire, electioni novi Pontificis incumbere, et ita secum manere debent, donec electio, ad quam duæ voces ex tribus necessariae sunt, completa fuerit: ideo hæc congregatio dicta est *Conclave*. Qui majoritatem duarum partium ex tribus obtinuit, eo ipso legitimus est Romanus pontifex et S. Petri successor, modo electioni suæ consentiat, nec ulla confirmatione indiget quia superiorum non agnoscit.

Cardinales ea non semper habuerunt insignia quibus nunc velut principes Ecclesiæ decorantur: Innocentius IV galorum rubrum cardinalibus e clero sæculari concessit, circa annum 1244; Paulus II, anno 1471 vita functus, biretam coccineam eisdem solemni decreto reservavit, et

dedit pannum rubri coloris quo equitantes equos sternenter, aliaque insignia quæ cardinalibus ex clero sæculari assumptis propria erant; Gregorius XIV rubrum pileum etiam regularibus, an. 1590, concessit; Urbanus VIII, anno 1630, statuit ut omnes, ratione dignitatis, deinceps non tantum vocarentur *Illustrissimi*, ut antea, sed *Eminentissimi*, et diceretur, *Eminentiae vestræ*. Vide *Devoti*, t. 1, p. 193.

#### P. II. — Legati.

Legati, sic dicti quia leguntur seu eliguntur ut mittantur, sunt quasi vicarii papæ, ab eo missi, ut ipsius auctoritatem in aliquo loco nomine ejus exerceant. Eorum existentia antiquissima est in Ecclesia: tres legati concilio Niceno I nomine S. Sylvestri papæ præfuerunt.

Tripliæ sunt generis, nempe 1<sup>o</sup> *legati a latere*, sic appellati, quia e sacro collegio et quasi ex latere summi Pontificis extrahuntur. Sæpe vocantur simpliciter *legati*.

2<sup>o</sup> *Legati missi*, vel aliter *nuntii apostolici*, sunt prælati non cardinales, qui ad principes pro obeundo apud ipsos ordinariae legationis muneremittuntur: olim dicebantur *apocrisiarii*, id est secretarii. Qui modo provisorio tantum munus legati exercent, dicuntur *internuntii*; si ad negotia minoris momenti mittuntur, dicuntur *ablegati*. 3<sup>o</sup> *Legati nati*, ii sunt qui possident titulum cui annexa est legati dignitas; quales olim erant archiepiscopus Cantuariensis in Anglia, Remensis in Gallia, Toletanus in Hispania, Bracarensis in Lusitania, Salisburgensis in Germania, Pisanus in Italia.

#### P. III. — Patriarchæ.

Patriarchæ, id est patrum seu episcoporum superiores, ii intelliguntur episcopi qui ratione sedis suæ aliquam habent jurisdictionem in plures ecclesiasticas provincias, etiam per varias regiones diffusas. In concilio Niceno I, can. 6, statuitur ut *antiqui mores serventur*, et tunc designantur jura patriarchica ecclesiarum Romanæ, Alexandrinæ et Antiochenæ, ut eruditè probat *Devoti*,

t. 1. Ergo jura illa jam erant antiqua. Tribus his patriarchis additi sunt postea episcopus Constantinopolitanus et episcopus Hierosolymitanus. De quatuor patriarchis Orientalibus late agit P. *Le Quien* in doctissimo opere dicto : *Oriens Christianus*. Reliquæ catholicæ regiones Romano pontifici, tanquam Occidentis patriarchæ, subjiciuntur. Jura patriarcharum Orientalium de facto non existunt, et tamen summus Pontifex titulares patriarchas creat, qui Romæ commorantur, ne memoria tam illustrum ecclesiarum pereat : sic et alii creantur episcopi et archiepiscopi cum titulis *in partibus infidelium*, id est antiquarum ecclesiarum nunc ab infidelibus oppressarum.

Alii sunt patriarchæ minoris dignitatis in media ætate creati, in patriarchatu Occidentali, seu in ecclesia Latina, ut patriarcha Venetus, patriarcha Indiarum, patriarcha Ulyssiponensis, qui quamdam habuerunt auctoritatem in metropolitas et episcopos talis regionis vel talis regni, et in conciliis immediate post majores patriarchas sedent.

#### P. IV. — *Primates*.

Post minores patriarchas veniunt primates, qui omnibus provinciis alicujus regionis vel regni præsunt, et jus anteferenda crucis per totum primatum habent, non tamen in præsentia papæ vel *legati ejus a latere* : appellationem a metropolitis olim suscipiebant.

#### P. V. — *Metropolitæ*.

Metropolis, a vocibus græcis μήτηρ, *mater*, et πόλις, *urbs*, significat urbem principalem : episcopus hujusmodi civitatis dictus est metropolita, et deinde, quia jurisdictionem in episcopos suæ provinciæ habebat, vocatus est archiepiscopus. Metropolita igitur unius provinciæ tantum præstet episcopis qui ipsius suffraganei vocantur. Jus habet celebrandi et crucem per totam provinciam in signum jurisdictionis deferendi, populum per vias benedicendi, appellationes suscipiendo et judicandi, synodus provinciale convocandi et in ea præsidendi, yica-

rium capitulare nominandi, si capitulum intra octo dies ab obitu episcopi non nominaverit. Causæ tamen criminales episcoporum reservantur, maiores ad summum Pontificem, et minores ad concilium provinciale.

Ex antiqua Galliarum disciplina, causæ etiam maiores ad summum Pontificem non deferebantur, quin prius in synodo provinciali judicata fuerint. (*Mémoires du Clergé*, t. II, p. 354; *Bossuet, Défense, etc.*)

Certum est metropolitas ante Concilium Nicænum I exstitisse, cum de provinciis ecclesiasticis in can. 5 et 6 agatur : plures non improbabiliter contendunt hujusmodi institutionem ad ipsos Apostolos ascendere ; et revera B. Paulus Timotheum et Titum constituisse videatur metropolitas, unum totius Asiæ, et alterum insulæ Cretæ.

#### P. VI. — *Pallium*.

Omnis patriarchæ, primates et metropolitæ habent pallium quo a simplicibus episcopis distinguuntur. Pallium autem est *fascia lanea candida, tres circiter digitos lata, in modum circuli contexta, quæ humeros cingit, habetque ab utraque parte lineas in pectus et humeros impendentes cum sex sericis nigrisque crucibus intextis, tribusque aciculis aureis consutur et alligatur*; *Devoti*, t. 1. Antiquissimus est pallii usus, et forte ab ipsa provinciarum ecclesiasticarum divisione repetendus est, vel a tempore quo presbyteri a diaconis, episcopi a presbyteris, suis ornamenti distingui coeperunt, quia probabile est speciale ornamentum archiepiscopis solemniter celebrantibus etiam fuisse concessum.

Pontifex Romanus, propter universalem suam jurisdictionem, ubique et semper utitur pallio : alii vero non nisi certis diebus, dum pontificalia conficiunt, et intra limites sue jurisdictionis.

Archiepiscopus electus, confirmatus et consecratus, nulla metropolitica munera obire potest, quin prius petierit et obtinuerit pallium, auctoritatis metropolitæ signum : illud alteri dare aut commodare non potest ;

cum eo sepeliendus est, et, si sedem mutet, aliud impre-  
trare tenetur; Decretal. I. 4, tit. 8.

Episcopi quarumidam sedium, speciali Sedis Aposto-  
licæ privilegio, decorantur pallio, quales sunt in Gallia  
episcopus Augustodunensis et episcopus Aniciensis.

Singulis annis duo agni candidi offerri solent die festo  
Sanctæ Agnetis virginis, 21 januarii; in ejus templo  
extra muros Urbis benedicuntur cum in Missa *Agnis Dei*  
cantatur, subdiaconis apostolicis traduntur, in aliquo  
sanctimonialium monasterio nutruntur, donec suo tem-  
pore tondeantur; ex eorum lana cum alia commixta et  
in filum deducta conficiuntur pallia: benedicuntur in  
basilica Vaticana per vigilio SS. Apostolorum Petri et  
Pauli, post vesperas solemniter decantatas, et super altare  
ubi conditum est corpus B. Petri depomuntur, et  
inde sumpta ad patriarchas et metropolitas mittuntur,  
ut ipsorum auctoritatem a B. Petro fluere noscatur; ita-  
que solius est papæ B. Petri successoris pallium con-  
dere. Vide Const. Bened. XIV, *Rerum ecclesiasticarum*,  
10 julii 1748, et l'Ami de la Religion du 1<sup>er</sup> mars 1850.

#### P. VII. — Vicarii apostolici.

Summi Pontifices olim suos quandoque constituebant  
delegatos in regno vel in provincia, ad gerenda vel ter-  
minanda graviora negotia, quæ ad judicium Sedis Apo-  
stolicæ pertinent, et hi vicarii papæ aut vicarii apostolici  
dicebantur. Nunc Sancta Sedes vicarios apostolicos, cum  
episcopali jurisdictione delegata, constituere solet, ubi  
metus est ne ecclesia diutius pastore suo careat, v. g.,  
propter persecutionem, turbas aut dissidia, vel si epi-  
scopus titularis ob senium aut aliam causam munus  
suum explore nequeat, aut a sedis sue administratione  
removeatur, vel in regionibus ubi titulares non sunt  
antistites: sic vicarii sunt apostolici in Batavia, in Sco-  
tia, in pluribus Indiae missionibus, etc. Alii consecrati  
sunt episcopi cum titulo *in partibus infidelium*, et alij  
simplices remanent sacerdotes, ut in coloniis nos-  
tris, et dicuntur *praefecti apostolici*. Respectiva eorum

potestas ex Litteris Apostolicis, quibus officium suum  
acceperunt, noscenda est.

#### P. VIII. — Coadjutores, suffraganei et administratores.

Coadjutor, a coadjuvando sic dictus, sicut tutor a tue-  
ndo, ille est qui, ex juris dispositione vel iudicis auctori-  
tate, ad titularem ecclesie adjuvandum vel supplendum  
constituitur. Alius est ad tempus et revocabilis, et alius  
in perpetuum cum futura successione: hic solus apud nos  
vulgo dicitur coadjutor, et est episcopus sub titulo *in parti-  
bus infidelium* consecratus, ad adjuvandum episcopum  
aliquem senio, morbo aliave causa impeditum, cui de ju-  
re, sine nova provisione, successurus est. Alter vero con-  
secratur etiam cum titulo *in partibus infidelium*, et datur  
episcopo titulari ad eum in munere episcopali adjuvandu-  
m, absque futura successione, et suffraganeus voca-  
tur. Per mortem titularis omnem amittit auctoritatem.

Administrator ille est qui, cum titulo *in partibus infi-  
delium*, regimini alicujus diœcesis auctoritate apostolica  
committitur, propter titularis absentiam, qualis nuper  
fuit in Gallia archiepiscopus Amasiensis, ecclesiam Lug-  
dunensem administrans. Auctoritas ejus ipso reditu titu-  
laris absentis penitus cessat. *Ferraris*, art. *Coadjutor*,  
n. 22.

Alii sunt episcopi simpliciter titulares *in partibus infi-  
delium*, qui nullius sunt coadjutores nec suffraganei, et  
nullam igitur habent jurisdictionem: episcopi titulares  
eos propria auctoritate in sui adjutorium vocare possunt,  
v. g., ad confirmandum, ad Ordines conferendos, ad mu-  
nia vicarii generalis explenda.

#### P. IX. — Chorepiscopi.

Chorepiscopus, idem significans ac episcopus ruris, a  
verbo græco χωρα, rus, vices episcopi in aliqua diœcesis  
parte gerebat; sicut episcopi senes, infirmi aut alia causa  
impediti, coadjutores vel suffraganeos habere poterant,  
ita qui nimis diffusis præsidebant diœcesibus, choropi-  
scopos, laborum suorum cooperatores, in pagis et in oppi-

dis a civitate episcopali longe dissitis habebant, qui plures curabant ecclesias, eas lustrabant, litteras pacificas vel dismissionias clericis in aliam diocesim abeuntibus dabant, minores Ordines conferebant. Quidam ex eis charactere episcopali insigniti erant, et tunc etiam majores conferebant Ordines, sicut hodie coadjutores et suffraganei.

Quoniam vero chorepiscopi intra limites jurisdictionis suae difficile se continebant, et jura episcoporum saepe invadebant, *tum ab hac sacra Sede, quam a totius orbis fuerunt episcopis prohibiti*, inquit S. Damasus papa, 1<sup>a</sup> parte Decreti, dist. 18, can. 15, relatus, et anno 384 defunctus. Diu tamen adhuc perseveraverunt, et a Leone III pontifice sublati sunt initio noni saeculi; sed etiam post hanc aetatem mentio chorepiscoporum occurrit. Vid. *Ferraris, v. Choropiscopus; Thomassin, etc.*

P. X. — *Prælati inferiores.*

Prælati, a voce *præfero* sic dicti, ii intelliguntur qui præ aliis sunt elati, et, juxta rem, ii sunt generatim qui cum honore et jurisdictione præficiuntur. Alii sunt regulares et alii sæculares. Non tantum nominativam habent potestatem in subditos, sicut pater in filios, sed spiritualem, quasi episcopalem et ordinariam, ut eos plene dirigere ac gubernare possint: tales sunt generales pro toto ordine, provinciales pro sua provincia, et superiores locales pro respectivis domibus sibi commissis, ut abbates locales, priores, rectores, guardiani, etc. Quidam generales et abbates usum pontificalium habent, et alii non habent: omnium potestas oritur vel ex privilegiis summorum Pontificum, vel ex præscriptione memoriam hominum superante.

Alii sunt a jurisdictione episcopi localis exempti, virtute privilegii Sedis Apostolicæ, et alii ei subjiciuntur. Qui de hujusmodi prælatis plura scire cupierit, consulat *Van-Espen*, qui caute admodum legendus est, *Thomassin, Ferraris, etc.*

Prælati sæculares sunt superiores, sive generales, sive speciales, congregationum sæcularium, id est, virorum

vel mulierum, qui solemnibus votis non devincuntur, quales sunt presbyteri Missionis, vulgo *Lazaristes*, presbyteri S. Sulpitii, sorores Charitatis, sorores Sapientiae, etc., et similiter ii quos Papa vel episcopus diocesanus constituit superiores sanctimonialium alicujus ordinis, vel talis monasterii: hi quippe omnes quasi episcopalem habent jurisdictionem in subditos vel in subditas. Caveant tamen ne limites suæ auctoritatis in litteris Papæ vel episcopi expressos aut usu determinatos, excedant. S. Congr. Conc. respondit, die 29 januarii 1692, sufficere quod capellanus monialium a superiore monasterii approbetur; sed, ex Constitutionibus Apostolicis Gregorii XV et Bened. XIII, necessaria semper est approbatio episcopi ad confessiones monialium valide audiendas, etiamsi de monialibus exemptis agatur. Vide S. Lig. I. 6, n. 977.

Romæ plurimi viri ecclesiastici, nomine ac dignitate prælatorum decorati, variis negotiis spiritualibus aut temporalibus gerendis adhiberi solent; titulo honorifico insigniuntur, quasi medium inter episcopos et simplices presbyteros constituant ordinem, sed nullos habent subditos.

**FINIS TRACTATUS DE ORDINE.**